

Dithero tsa Tirelano mo Kutlwanong

10/2014 Ka Sontaga wa 1 morago ga moletlo wa Epifania, e le ka 12. 01. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 395 - 362/374

2. Thapelo: Ke opela ka bopelotlhomogi jwa MORENA, go ya bosakhutleng. Ka molomo wa me ke itsise ditlhogolo le ditlhogolo tsa me boikanyego jwa gagwe. Amen.

3. Epistolo ka fa thulaganyong ya 2 e kwadilwe mo go Baroma 12:1-8;

Efangele ka fa thulaganyong ya 1 e kwadilwe mo go Matheo 3:13-17.

4. A go ipolelwe tumelo ya bokeresete!

5. Sefela sa 367 - 339/346

6. Thapelo ya mmadi wa thero.

7. Lefoko la thero ka fa thulaganyong ya 6 le kwadilwe mo go Jesaya 42:1-9, le re: Modimo wa re: “Bonang, motlhanka wa me ke yoo, yo ke mo tshegetsang; le moitlhaolelwa wa me yo o natefelang pelo ya me. Ke mo neile Mowa wa me. O tla ntshetsa tshiamo kwa merafeng. Ga a kitla a goa le e seng go tsholetsa lentswe, le e seng go le utlwatsa mo mmileng. Ga a kitla a roba lotlhaka lo lo pšhwetlegileng; ga a kitla a tima mogala wa lobone o o takatajang, mme o tla tlisa tshiamo ka nnete. Ga a nke a koafala le e seng go lapa go tsamaya a tlhome tshiamo mo lefatsheng, le go tsamaya ditlhakatlhake di lebelele thuto ya gagwe.’ Modimo Morena yo o tlhodileng legodimo a le phutholola; yo o adileng lefatshe le tse di tlhogang mo go lone; yo o nayang batho ba ba mo go lone botshelo, ba ba tsamayang mo go lone mowa, o bua jaana a re: ‘Nna Morena, ke go biditse ka tshiamo ka tshwara seatla sa gago, ka go boloka, ka go dira kgolagano ya morafe le Modimo le lesedi la merafe gore o budulole matlho a difofu, o ntshe batshwarwi mo botshwarong, le ba ba ntseng mo lefifing mo ntlong ya kgolegelo. Ke nna Morena, ke lone leina la me! Mme kgalalelo ya me ga nkitla ke e naya ope o sele, le e seng go naya medimo ya diseto tlotlo ya me. Bonang dilo tsa polelo-pele di dirafetse! Mme tse dintšhwa ke a di bega, ke di lo bolelela di ise di simologe.” Amen.

8. Thero: Ee, phuthego e e rategang mo Moreneng, Modimo wa roma lesedi la ona mo lefatsheng. Lesedi le ke Jesu Keresete. Lefatshe le ne le sa le amogela. Jesu a re: "Ke nna lesedi la lefatshe; yo o ntshalang morago ga a ka ke a tsamaya mo lefifing, mme o tla nna le lesedi la botshelo," Joh. 8:12. Le rona re ne re ntse re opela khorose, e e reng: "Ke tla tsamaya mo leseding la Morena." Ra tloga re reng, fa re ne re opela jalo? Jesu a fiwa ke Modimo Rraagwe boemo jwa go nna Motlhanka. Gape wa mmita, wa re: Ke Moitlhaolelwa wa me, jaaka rona re ba ba tlhaoletsweng ba ona ka Jesu ka ntlha ya bopelotlhomogi, re kopantswe le boitlhaolelo joo mo kolobetsong. Jesu o tlhaoletswe ke Modimo Rara ka maikaelelo a gore re ntshiwe mo lefifing, re tsenngwe mo leseding, Ke gore a sedimosetse ba ba agileng, le go tsamaya mo lefifing gore ba tswe mo go lona. Modimo wa itumelela go nna teng ga Jesu, wa re: Bona, "yoo ke Morwaake yo o rategang, yo ke mo itumelelang." Rona re tshwanetse go utlwa Mopholosi wa rona, le go mo sala morago. Modimo wa baya Mowa wa ona mo godimo ga Morwaa-ona. Jesu ke ene yo o tla ntshetsang merafe katlholo. Ke gore ba ntshediwa mo leseding, le go baakanyediwa tshegofatso le lesego la kgolagano e ntšhwa ya Efangele ya bopelotlhomogi jo bo mo go Jesu. Modimo o rera tshiamo ya ona ka Jesu, e le Efangele ya boitshwarelo jwa maleo. Taletso eo, ga se botlhe ba ba e amogelang, bangwe ba a e amogela, ba bangwe ba a e gana. Re biditswe gore re mo direle ene fela.

Phuthego, Jesu Mopholosi wa rona o a itsise, le go kuela tshiamo ya Modimo e e leng Efangele ya bopelotlhomogi le kagiso. A re gopoleng gore Jesu o ne a boga, go tloga mo bonyaneng jwa gagwe, a fitlhelwa mo sebakeng sa go gola, a dira tiro e a e rometsweng gore a e dire, a laolelwa gore a swele mo sefapaanong, a swele teng ka ntlha ya maleo a Lefatshe lotlhe, a sa dire fela thato ya gagwe, mme bogolo thato ya ga Rraagwe yo o mo legodimong. Modimo wa batla, wa rata go itshenolela mo go rona ba baditšhaba ka Jesu Morwaa-ona, o ntse o re senolela bopelotlhomogi le bopelotelele jwa Modimo ka Keresete mo go rona ka Disontaga tse re rerelwang ka tsona dikgang tse di molemo tsa ga Jesu.

Phuthego, rona fa re bona matshwenyego, re felelwa thata, re patikwa mo go maswe, fa re tlalelwa, gongwe fa re bogisiwa, mme Mopholosi wa rona ga a ka a lapa, o ne a sa latlhegelwe ke thata, fa a ne a kopana le dipogo. Gopola, fa Bajuta ba ne ba mo ganetsa, gantsi ba lekile go mo thaisa serai go mo tshwara, mme ba ne ba palelwa, gonne nako ya gagwe e ne ise e tle. Re gopola Mowa o o Boitshepo o o neng wa fologela mo go ene, gonne Rraagwe o mo tloditse ka ona gore a rerele ba ba kokobeditsweng molaetsa wa boitumelo, le go gomotsa dipelo tse di reregileng ka ntlha ya maleo, le go ba ntsha ba ba golegetsweng ke Satane mo kgologelong.

Modimo o re ratile, wa roma Jesu gore a re ntshe mo kgolegelong ya ga Satane. Gopola sefela se se reng: "Ke ne ke tshwerwe ke maleo a me, ka golegwa ke Satane. Mopholosi ke yo, o mo amogele, o mmitse, o mo kope gore a go ntshe kwa o golegeletsweng teng."

Modimo o dirile tsotlhe, wa tlhola lefatshe le motho. Mo godimo ga tse tsotlhe tseo Modimo wa bona gore motho o tlhoka sejo sa semowa. Motho o tlhoka, gongwe o tshwanetse go tthamaladiwa ka Lefoko la ona. Ke gona wa go solofetsang, wa re: "Se boife, gonne ke go golotse, ke go biditse ka leina la gago! O wa me." Le kajeno Modimo o go naya tsholofelo. Ke ka ntlha ya eng, fa o sa arabe, fa o bidiwa? Gongwe o leka go dira tse di dirilweng ke Atame? O iphitlhelang? Araba, motho wa Modimo, ona o rata go go thusa gore o nne tsala ya Motlhodi wa gago. Modimo wa baya Jesu gore e nne lesedi la rona ba re leng ba baditšhaba. Ke nnete! Mowa o o Boitshepo o re biditse ka Efangele, wa re sedimosetsa ka dineo tsa ona, wa re itshepisa, wa re bokokela mo tumelong e le nngwe fela wa nnete. O sa ntse wa phutha, wa itshepisa phuthago yotlhe ya ga Keresete e e mo lefatsheng, o e bolokela mo go Jesu mo tumelong e le nngwe fela ya nnete. Ke ka fa Modimo o re dikanyeletsang ka teng ka Jesu. Jesu a nna kgolagano gore Modimo o ruane, le go letlana le batho ka tiro ya ga Keresete, o sa re baleleng ditlolo, mme o thee Lefoko la thuano. A re tsamayeng mo leseding la Morena.

Modimo o a batla, o a rata gore rona ba re kileng ra tsamaya mo lefifing, re bone lesedi le legolo. Le ka bone ba ba sa ntseng ba agile mo moriting wa loso, o a rata gore ba sedimosediwe ka lesedi la ona. Nna, MORENA, ke go biditse gore o tswe mo lefifing, o nnele ruri mo leseding la Morena wa gago. Modimo o rata go budulola matlho a gago, wena yo o leng sefofu. Jesu a re: "Fa lo ka bo lo le difofu, lo ka bo lo se na boleo; jaanong ka lo re: 'Lo a bona!' boleo jwa lona ga bo tloge." Ke ka ntlha ya eng, fa re sa batle gore Jesu a re ntshe mo kgolegelong, gongwe mo lefifing? Re tla swela mo go lona, fa re sa tlihabologe, fa re sa batle go amogela thuso e e tswang mo bopelothomoging jwa Modimo. A lorato lo logolo lwa Modimo lo o ratang baleofi ka lona ke loo! Mo go Jesaya 35:5 go kwadilwe gore "Foo matlho a difofu a tla fofologa, ditsebe tsa disusu di tla kabologa." Rona batho ba re leng difofu ka fa tlihangong re rerelwa Efangle. Go sego ba ba sa kgopisegeng ka Morena Jesu.

Phuthago, Modimo wa re: "Ke nna Morena, ke lone leina la me! Mme kgalalelo ya me ga nkitla ke e naya ope o sele, le e seng go naya medimako tlotlo ya me." Johane a re: "Amen! A poko le kgalalelo le botlhale le tebogo le tlotlo le thata le nonofo e nne tsa Modimo wa rona go ya bosakhutleng! Amen," Tshen. 7:12. Ke ka ntlha ya eng, fa Morena a tshwanetswe ke poko e e ntseng jalo? Ke ka ntlha ya gore ke ene yo o tlihodileng dilo tsotlhe, le ka ntlha ya thato ya

gagwe, fa a rata gore dibopiwa tsa gagwe di nne teng. Paulo le ene o a tiisa, a re: "Ke ene fela yo o nang le bosasweng, yo o agileng mo leseding le le sa ka keng la atamelwa, yo o iseng a ke a bonwe ke motho ope. Yo o sa ka keng a bonwa ke ope. Ke ene yo o tshwanetsweng ke tlotlo le puso e e sa khutleng. Amen," 1 Tim. 6:16. Re ka naya dilo tsa lefatshe jang tlotlo le kgalalelo? A ga di a tholwa ke Modimo? Tsa ntlha di kile tsa tla, mme kajeno Modimo o rera tse dintšhwa, e le tsa Efangele ya bopelotlhomogi le boitshwarelo jwa maleo jo o bo abelwang ke Jesu Keresete, Morena wa rona. A le wena tsamaya, o nne mosupi wa Efangele ya bopelotlhomogi jwa Modimo mo bathong! Amen.

9. Thapelo: "Tshiamo le molao ke motheo wa sedulo sa gago sa bogosi; bopelonomi le boammaaruri di etelela sefatlhego sa gago pele. Go sego morafe o o itseng go duduetša, o o tsamayang mo leseding la sefatlhego sa gago, MORENA. Ba ipelela leina la gago ka metlha, ba godisiwa ka tshiamo ya gago. Gonne wena o mokgabo wa thata ya bona, o tsholetsa lonaka lwa rona ka bopelonomi jwa gago," Pes. 89:15-17. Amen Thapelo ya Morena: Rara wa rona yo o mo legodimong ...

10. Sefela sa 265 - 247/257

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. M. Mkhabela ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.